

Herbamora

Herbamora ye un grupu vocal y musical asturianu formáu por cinco muyeres: María Gavieiro, Natalia Nuño, María Vázquez, Elena Rodríguez y Paula C. Casu. Nació en 2003, el grupu surge cola intención de dar aire nuevo a la tradición de la pandereta asturiana y transformar los estereotipos venceyaos a esti instrumentu, apostando por una fusión ente lo tradicional y lo contemporáneo.

En 2007, Herbamora revolucionó'l panorama musical asturianu col so primer discu, *¡Sali, Lluna!*, un trabayu innovador que combinó la tradición col jazz, el funk o el rock. Nesti discu inclúyese *Nosh*, tema premiáu col Premiu al Meyor Cantar en Llingua Asturiana d'esi mesmu añu. El discu recibió tamién nominaciones a los Premios AMAS.

En 2013 publicaron *N'acústicu*, un EP más íntimu y cuidáu nel que reinterpretaron parte del so repertoriu anterior con arreglos musicales nuevos, acompañaes por músicos como Elías García (bouzouki) y Marcos García (acordeón).

En 2024 tornen a l'actividá discográfica tres unos años de silenciu con un tercer trabayu mui esperáu: *286 Llunes*, un EP que marca una nueva revolución dientro de la música asturiana. Con arreglos onde se mesturen voces, panderos, panderetes, castañueles y electrónica, el discu ye un viaxe sonoru que combina tradición, innovación y empoderamientu femenín. Les lletres, basaes en cantares populares,



falen d'amor, desamor, muerte, naturaleza o llabores rurales, siempre dende una perspectiva que sorraya la sororidá y la reivindicación de la muyer como protagonista de la so propia historia.

El 21 de febreru de 2025 publicaron el so primer videoclip, *Lluna de Collecha*, y el 22 de marzu presentaron oficialmente'l discu en La Benéfica (L'Infiestu). El reconocimientu nun se fizo esperar: el 7 de marzu ganaron el Premiu AMAS 2024 a la Meyor Canción Folk, confirmando que siguen siendo un referente na música de raigañu y na renovación de la cultura asturiana.

Nel so percorríu, Herbamora participó en festivales internacionales como'l *Summer Tyne Festival* (Newcastle, Reino Xuníu) o *El Festival Interceltique de Lorient* (Bretaña, Francia), amás d'actuar a lo llargo d'Asturies. Nesti añu 2025 actuaron n'escenarios de primer nivel como'l teatru de La Llaboral (Xixón) y festivales como La Folixa na Primavera (Mieres).

L'actividá d'Herbamora ta guiada pola direcció vocal de Ruth Suárez, profesora de técnica vocal y productora musical del EP.

Con más seguridá, madurez y fuercia que nunca, Herbamora seguirá llevando la voz de les muyeres, la tradición asturiana y la innovación musical a nuevos escenarios, defendiendo la llingua asturiana y la identidá colectiva dende la creación artística.

